

15 JUL 1998

Iran

IRAN HARAP UNTUK TINGKAT DAGANGAN DENGAN M'SIA

KUALA LUMPUR, 15 Julai (Bernama) -- Jumlah perdagangan antara Iran dan Malaysia boleh ditingkatkan kerana kedua-dua negara mempunyai kemampuan dan potensi untuk berbuat demikian.

Timbalan Menteri Luar Iran bagi Asia Pasifik Mohsen Aminzadeh berkata kedua-dua pihak harus meneroka bidang-bidang lain bagi kerjasama selain dalam sektor pengeluaran minyak dan gas.

"Jumlah perdagangan tidaklah begitu tinggi tetapi berdasarkan kemampuan dan potensi kedua-dua negara, saya percaya ia boleh mencapai ke tahap lebih tinggi," kata beliau kepada pemberita di sini hari ini.

Mohsen telah menemui Perdana Menteri Datuk Seri Mahathir Mohamad dan Menteri Luar Datuk Seri Abdullah Ahmad Badawi. Beliau tiba di sini semalam.

Beliau berkata Iran sedar akan masalah ekonomi yang dihadapi oleh beberapa negara Asia termasuk Malaysia tetapi percaya bahawa Malaysia masih mampu menyertai dalam pembangunan Iran.

Mohsen berkata bidang-bidang lain yang memungkinkan kerjasama antara Malaysia dan Iran ialah pengeluaran, pembinaan stesen janakuasa, elektronik dan komputer serta pelancongan.

"Iran ingin lebih banyak pelaburan dalam pembinaan stesen penapis minyak dan petrokimia," kata beliau.

Beliau berkata Iran juga telah menjalankan program untuk menubuhkan zon perdagangan bebas yang boleh dimajukan lagi dengan penyertaan Malaysia.

Mengenai pertemuannya dengan Dr Mahathir, Mohsen berkata beliau menyampaikan perutusan daripada Presiden Mohammad Khatami kepada Perdana Menteri.

Beliau tidak menyatakan kandungan perutusan berkenaan sekadar berkata ia meliputi perkara seperti kerjasama dua hala dan isu-isu kepentingan bersama.

Mengenai hubungan Iran-Amerika Syarikat, beliau berharap beberapa usaha positif akan digerakkan bagi menghapuskan rasa tidak percaya mendalam yang wujud antara kedua-dua negara.

-- BERNAMA

MAM FAZ